

## Nwàk nè Pol à Còm Fa Bùu sè Mvwe' Lak FÌLIPIYÀ

*Nwàk nè Pol à còm fa bùu Filipiyà ènə, yi à còm fa nà' yà'sə bohòcos nə yi à muk to tsə cip mvwe' nze Màsìdoniyà nə. Yi ànə còm ngòkwe'sə nà' nga yi cu ndapndzəm. Pol à kwe'sə wo də wo sə cum ncu nə krətəŋ tse' ngòcu nə. Mvəsə yi à sə kwe'sə wo, yi sə cep bə nza' kwəkwa kəkə', kəkə'.*

*Yi à còm sè' ngòkwasə bùu Filipiyà wèŋ sə bə bum sè wo à tumsə fa yi ngòtesə yi nga yi cu bə ngə'. Yi à jə mvək ènə sè' ngòcèp də yà'wèŋ ko ntəm bə ngə' nə yi sə yə, nə ye bə ngə'ə sè yà'wèŋ sə yə sə sè'.*

*Pol à cèp ncèep mok sè guguŋ də, <<Ngòcu ŋwəm a ngòsə naaŋ tu bohòKrest, nə ye də ngòkrə a sè' swe'>> (ye ŋgo 1:21). Yi à cèp sè' də bum sè yi à sə kùmghè ngùŋ bə zəŋ sə yà'a bohòyi nga'a mok co bèp (ye ŋgo 3:4-11). Yi cep məm̀vè'nə yi sə lù guguŋ də nga yi nə kə ghak nə tse' lèlà' nə (3:12-14). Yi yəm ŋkì mok ngòkùksə Jisòs bə zəŋ (ye ŋgo 2:5-11). Nè'nə ŋkì mòk nə mantombì nə nà' fom wùriŋ nə wo à còm nòŋsə nà'. Nà' sə cèp bum ba bə liŋ Jisòs: yi à jə ni' ye sə nze fana Nwì bəsə yi ŋwə nə ghaŋ.*

<sup>1</sup> Còm nwàk nè'e mùu Pol ves Timatì. A ves sè vèes ngàa fàk bohòJisòs Krest. Vès com fa nà' bohòwèŋ sè wèŋ bùu Nwì pwe' sè wèŋ cu

mvwe' lak Filipiyà, nè ye bùu awèŋ sè mantombi bə sè wo tesəgè mɔ cos.

<sup>2</sup> Nwì nè yi tè' àvès bə Tà Jisòs Krèst gu wèŋ bəbɔŋ, nè fa wèŋ fifi.

*Pol Kwasə Nwì Nə Kwe'sə Krətèen Sə Filipiyà*

<sup>3</sup> Ghà yà lòŋ nè mɔ tsərəgè wèŋ fana, mù kwasə Nwì àm.

<sup>4</sup> Nə ye sè' duk də, ghà yà pwe' nè mɔ lɛŋ fagè wèŋ piriya fana, mù lɛŋ bə kwəkwa sə ntuù mù.

<sup>5</sup> A vɛ'nə bùu nsàp tətəsè nè wèŋ à fa mɔ bə fàak Ntirè nè Bəbɔŋ nə. Wèŋ à tesə yèto mɔ numbu nè wèŋ à yuk to Ntirè nè Bəbɔŋ nə tètè kə dzeŋ ŋga'a.

<sup>6</sup> Mù rì bə nè zìnə duk də, yi Nwì nè yi à yèto nsàp fàk nè bəbɔŋ ènə sə ntuù wèŋ nə gu mali yà' tètè numbu nè Jisòs Krèst nə və sèmok.

<sup>7</sup> Mɔ tsərəgè wèŋ vɛ'nə busə wèŋ cu sə ntuù mù. Wèŋ à be'lə mɔ sənə bòvəm nè Nwì a fa mɔ. Yà' à yè jə taan ghà nè mù à sə lù ŋgòdə Ntirè nè Bəbɔŋ nè Krèst nə zìnə, tè kə dzeŋ ŋga'a nè mù sə cu mɔ ndapndzəmè.

<sup>8</sup> Mvəsè mù duk də dzədzəm àm nè ghaŋ nè mù tse' nà' bohòwèŋ sə və bohòJisòs Krèst bə tu ye fana, Nwì sə rì ye sè' də mù sə cèp zìnə.

<sup>9</sup> Piriya njàm nè mù sə lɛŋ fa ween duk də, dzədzəm awèŋ sə kuk ghaha lo mantombi, nè ye bə ŋkərə nè bəbɔŋ sè'. Də wèŋ tse' nsàp ŋkərə nè ŋgògàpsə rì yusè yà'a bəbɔŋ bə sè yà'a bɔp.

<sup>10</sup> Yà'a ye vɛ'nə ŋga wèŋ riŋ mvəsè ŋgòcokfis jə yusè yà' bògha' càsə pwe'. A sè' zeŋ sè yà'a

nə tēsə tè Krest kə bwì və nùu ŋga wèeŋ bùu sè rərəŋ, wèŋ kà nzak tse'.

<sup>11</sup> Ncum awèŋ sè wèŋ cu, ye megu bəboŋ, bəboŋ nə nà' vè bohòJisòs Krest yìiyi. Bùu sè wo yə bum yè'sə, wo nə kwasə Nwì, nə kuksə yi.

*NgòCu Nwum Yè'sə Yà? BohòMù A Krest*

<sup>12</sup> Bwema am wèŋ, yusè mù sè dzəm də wèeŋ riŋ tse' də, nsàp ŋgə' nə nà' a tsèŋ mɛ nà'a, nà' a tēsə Ntirè nè Bəboŋ nə ŋgòlòmantombi.

<sup>13</sup> Dògarìi sè wo kùkgè nto' ŋkum, bə bùu mok fəŋ pwe' a riŋ də mɛ ŋgà ndapndzəm bùusè mɛ mo ŋgà fàk Krest.

<sup>14</sup> Mok sè' duk də, ndapndzəm nè mù a ni nə, a gɔŋsə bwema ŋkùuŋ ma nè Tà gɔŋsə. Wo sè gɔŋ ghaha nùumbu pwe' ŋgòtsòho ncèp Nwì, nə kà wɛ tse'.

<sup>15</sup> A lɛ də mok sè tsoho liŋ Jisòs Krest bə njo nè də wo sə wa fàk am, nə sè ləp ŋgòjə kù am. Mok sè tsoho yàwo bə ntum nè rərəŋ làaŋ.

<sup>16</sup> Wo yè'sə sə gù vɛ'nə bə dzədzəm bùusè wo rì pap də Nwì a fa mɛ fàak sè ŋgòtəəŋ gèem Ntirè nè Bəboŋ nə.

<sup>17</sup> Mok sə sə kà liŋ Krest nə bə nè zìnə tsòhò. Wo sə tsoho bə yòŋsè wi' nə sə vèə wo. Wo sə duk ŋgwàaŋ də aco wo yamsə ŋgə' àm mvəsè mù cu mɛ ndapndzəmè.

<sup>18</sup> A ye-a sè' vɛ'nə, yumok kà bɔp. A ye-a də a sə vèə wo bɔp kè bəboŋ àlɛ, yà' ka mɛ yaaŋ, mù sə kwa yam-e bə zəŋ kwa. Yusè gɔgɔŋ sə duk də bwìŋ sə yuk mali liŋ Krest. Yà'a mbwè njo nè mù sə kwa nə.

19 Mù nè sà kwa sè' bùusè mù rì duk dè mù nè tēsè li bùu piriyaà awèŋ nè ye bə tətēsè nè nà'a vè bohòYòŋsè Jisòs Krest.

20 Bə nè zìnə, ntəm àm tə gù duk dè mù kà co marè'tu ko mù gù. A ye lɛ dè ye jəŋ ŋga'a nè lo mantombi pwe', mù ban ntəm ya mù kuksə Krest bə ni' àm pwe'fo'. A dzəm ye kpɛ kè lùŋ-è, mù dzəm ŋgòkùksə liŋ Krest.

21 Mù duk vɛ'nə bùusè ŋgòcu ŋwəm nè yè'sə ya? Bohòmù yàm, a ŋgòrìŋ Krest, nè ye dè ŋgòkpɛ, a sè' swe'.

22 A sè' duk dè ŋga mù cu mali-a ŋwəm, aco fàak sè mù gu tēsè li bwìŋ sè'. Mù ka ma nè mù lo riŋ.

23 Mù tə yè'sə mətsetsə'rə ndzəp. Mù dzəm dè mù lo yu am kə cum ves Jisòs. Bògha' ca zəŋ nè nəm ŋgòcu sə nzeŋgòo fən.

24 Yumok sè yà' gu càsə sè' duk dè, mù cum mali ŋwəm bùu tu awèŋ.

25 Mù rì pap dè yè'sə zìnə. Fana mù rì dè mù nè cum mali ŋkuŋ ŋgògɔŋsə wəŋ bùu yusè wèŋ a dzəm, ya wèeŋ tse' kwəkwa ŋkùuŋntèŋ sè'.

26 Ya ŋga mù vè kè tsècŋ wəŋ sèmok fana vesùwèŋ kwa mvwe' mò'fis bohòJisòs Krest bùu tu am.

### *Təəŋ Guguŋ Mvə'nə Wèŋ Sə Naan̄tu Bə Ntirè Nè Bəboŋ Nə*

27 Yusè guguŋ sə də, ncu awèeŋ ye kəkərè bohòbwìŋ co bùu sè wo a dzəm Ntirè nè Bəboŋ nè nà'a nè Krest nè. A ye-a vɛ'nə fana ŋga mù vè bə nè mù ka vè pwe', mù sə yuk dè wèŋ tə guguŋ bə yusè mò'fis, nè tse' cù mò'fis, nè sə lɛ

mvwe' mò'fis bùu Ntirè nè Bèboŋ nè wèŋ a dzəm nə.

<sup>28</sup> Nə ye sè' də wèŋ sə kà bùu sè wo bènḡè wèŋ wəp lok. Yà'sə nə ɣu wo riŋ də wo nə kpu bisə wà, wèŋ tse' yàwèŋ lùŋ nè nà'a nè kà mè. Nwìi nə niŋ tsok fa wo sè' vɛ'nə.

<sup>29</sup> A də Nwì a fa wèŋ mandzè ŋgòdzəm bohòKrest, nə kà vɛ'nə mèḡù, wèŋ tse' ŋgòyè ŋḡə' bùu yi sè'.

<sup>30</sup> Nè ŋga'a nè'e vesùwèŋ sə lù bə yusè mò'fis. Cu mali lù nè wèŋ nà yə taan ŋga mù sə lù nà'a, haŋ ŋga'a wèŋ sə yuk də mù sə lù mali ntòzeŋ.

## 2

### *Tse' Nsàp Ntəm Nè Jisòs Krest Nà'a*

<sup>1</sup> Ncu awèŋ nè wèŋ cu nà' co bùu Krest, kwɛ'səḡè wèŋ à? Dzədzəm ye fisəḡè wèŋ ntəm à? Wèŋ tse' kwəkwa nè mvwe' mò'fis wèŋ yòŋsè ye nə wèŋ à? Nə ye də wèŋ tse'ḡè ntəm nè bèboŋ nə ye koksèmanziŋ bohòmòk bə mòk à? A vɛ'nə.

<sup>2</sup> A ye-a vɛ'nə fana, mù dzəm də wèŋ tse' nsàp tsətsəɾè nè mò'fis, nə sə dzəm mòk bə mòk, nə ye cù mò'fis, ya mu kwa wesə.

<sup>3</sup> Kà də wèŋ me'rə wi' bə nènì' sə ntùù wèŋ duk. Wèŋ jəŋ ni' awèŋ sə nze, nə kà bùu mok co wèŋ ḡha' wo wèŋ sə kùk.

<sup>4</sup> Ndàanwè pwe' lap mandzè nè ŋgòḡù yusè co yà' tɛsə ŋwè nəmòk sè', yi kà bə ni' nè nje tsəɾè mèḡù.

<sup>5</sup> Wèŋ tse' nsàp ntəm nè Jisòs Krest à tse' nà'a.

<sup>6</sup> Yi à ye Nwì bə tu ye sè',

fana yi kà nsàp ntùm nè dè yi nè mam tsoon bə  
Nwì yəyərè tse'.

7 Yi me'rə mvwe' sè ghan yà'sə,  
nə jə tsoon ni' ye sə nze, nə ye co ŋkwèŋ,  
wo dzə yi mok co ŋwè ve'.

8 Mvəsè yi à ye co ŋwè ve'nə fana,  
yi jəŋ tsoon ni' ye sə nze sèmok,  
nə yuk yusè Nwì à dè yi gu, nə kə kpu mu ntəəŋ.  
Nsàp kpu nè a kpuḡè ve'nə bùu sè bup.

9 Bùu nsàp nè yi à gù ènə fana,  
Nwì a yamsə yi nsàp nè wù kà fùk.  
Nwì a fa yi liŋ sè yà' yam gha' liŋ pwe'.

10 Ye də, bwìŋ pwe' nə kə təəŋ bə tumfərə  
mantombii Jisòs ŋgòkùksə yi.  
A nè ye bùu sè wo mabu bə sè sə nzeŋgòo fəŋ,  
nə ye bə sè wo cu ma sə mbwè nze pwe' nə kùksə  
yi.

11 Wo nè cep fis bə cùu awo jəja mvwe' bwìŋ duk  
də Jisòs Kræst Tà.  
Yà'sə nə kùksə tè' ye Tà Nwì sè'.

### *Wèeŋ Rəŋ Co Marəŋ*

12 A ye-a ve'nə fana, bwema am wèŋ, mvə'nə  
wèŋ à sə yuk nə kotse' ntirè nè bèboŋ nə ghà  
nè mù à ye vesùwèŋ yà'a fana, mù sə duk də  
gu gha' də wèeŋ kotse' ŋga'a nè mù ka vesùwèŋ  
yeŋ nè'e. Wèeŋ fak bə wəə, nə sə jik ŋgògù də  
lù nè Nwì a fa wəŋ nə sə fak sə ntuu wèŋ.

13 Busè Nwii fàkgè mutsətsə'rə wèŋ ŋgògù  
wəŋ də wèeŋ dzəm nə gu yusè yi dzəm yà'.

14 Bə yà pwe'fo' sè wèŋ sə gùu nə sə cep ŋkùəm  
kà fo' sə tesè.

15 A ye ve'nə ya wèeŋ ye bùu sè wèeŋ rərəeŋ, nə ye jì njo. Ya wèeŋ ye bwe Nwì sè ntəm rərəeŋ sè wèeŋ cu sənə nzeŋgònè bùu sè ca ka rərəeŋ yeŋ, wo ɲgàa tè'èŋkup. Wèeŋ tse' ɲgòsə rərəeŋ yàwèŋ mətsetsə'rə wo co ɲkəŋkəŋ sə rərəeŋ mabu,

16 mvəsè wèeŋ sə tsè' fa wo ncèp nè nà' tse' lùŋ nə. Wèeŋ gu-a ve'nə fana, numbu nè Krest vè səmok, mù sə kum ɲgù àm bùu wèeŋ fana yà' kà ɲgwàŋ ye. Yà'a nə sə niŋ duk də fàk am sè mù à gə, nə yis ndùrè, yà' ka wà ca.

17 Dzədzəm awèŋ nè wèeŋ à tse' nà' bohòNtirè nè Bèboŋ nə, nà'a co satikà' bohòNwì. A ye-a də yòŋsè am kə ye rùk nè wo jə-a nà', nə se gesè mənə satikà' ànə, mɛ nə kwa, nə kwa vesùwèŋ lòoŋ mvwe' mò'fis sè'.

18 Gù sè' mɛmvè'ànə duk də wèeŋ kwa tsooŋ yàwèŋ sè'. Vesùwèeŋ kwa mvwe' mò'fis.

### *Timati Bə Ipàfoditò*

19 A ye-a ɲga Tà Jisòs fa-a ɲàŋ, mù tsəm də mvèk momjo mɛ nə tumsə lo Timati ɲgòkə ye weŋ. Mɛ nə tum yi ya yi bwì vèə, yi tsok fa mɛ mvè'nè wèeŋ cu, ya ntəm am sə ləm sè'.

20 Mègù yi Timati nə nè tsətsərè vesi yegè nsàp nè mò'fis. Yi tse'gè weŋ sə ntuu yi ve'ε wùriŋ.

21 Bùu mok pwe' sə tsərə gu bə fàak awo, wo sə kà ma nè Jisòs Krest tsərə.

22 Wèeŋ rì yàwèŋ sè' laŋ də, Timati ènə ɲwè nè bèboŋ. Vesi a tsòho Ntirè nè Bèboŋ nə mvwe' mò'fis co mwe bə tè' sə fàk wo.

23 Mù sə tsəm də ghà nè mɛ riŋ də anə ye bohòmè vale àle ɲkuŋ mɛ tum yi laŋ.

24 Mù rì tse' sè' zìnə duk də, mvək momjo, Tàa nə gu co mɛ və bə tu am, nə kə tseŋ weŋ sè'.

25 Mù a tsərə də a bəboŋ ɲgòtum fəsə fa weŋ moma avès Ipàfoditò, nə yi a ye masinjà àwèŋ, nə tɛsə mɛ. Yi a fàk, nə jìhi nzòŋ vesi bəbɛ', ɲgòtɛsə mɛ bə fàha am.

26 Ntɔm ye sə fa yi ɲgə' ɲgòyə wèŋ wùriŋ. Yi sə kà kwa lok də bùusè wèŋ na yuk duk də yi a ya.

27 A lɛ zìnə də yi a ya laŋ anə. A gù jo də yi a kpɛ. Megu də Nwì a koksə manziŋ bohòvesi ba fò', yi kà kpɛ, ya ɲgə' mook kà mɔnə ɲgə' nə mù cu bə zeŋ nè'e naàŋ fe'lə lò.

28 Fana mù sə dzəm wùriŋ də mɛ tum yi kə ye weŋ, ya wèŋ yə yi, ntɔm awèŋ fi, ntɔm nə ɲjàm kà mok sè' rwi' fe'lə.

29 Yi vəə, wèŋ wumsə yi bə kwəkwa co moma nə ndzənə Tà. Wèŋ yə nsàap bùu sè co yi ànə, wèŋ wəp wo bəboŋ.

30 Bùsè yi jə yòŋsè ye nsàp mok, nə swirə kpɛ bùu fàak Krest, nə fa mɛ tətɛsə nə à ye co wèŋ kà mɛ bə tu awèŋ kə fa.

### 3

#### *Mandzè Nə Zìnə NgòYe Rərəŋ BohòNwi*

1 Bwema am, ncèp àm nə ɲgòlèsə bə zeŋ duk də, wèŋ sə kwa bə bum sè ma nə Tà Jisòs. A ye-a sè' də mù sə com fe'lə sè yusè mù ànə com yà' mantombi laŋ fana mù sə kà bə zeŋ wò. Yà'a nə tɛsə weŋ ya wèŋ kà mandzè jàm.



<sup>2</sup> Wèeŋ kərə bə nsàp bù nè wo co ŋgbu, sè wo sə duk dɛɛ, ŋwè tse' ŋgòsɛə tsə ŋgùpni' yà'a.

<sup>3</sup> Bùu sè wo a kom fa wo tu sè zìnə, co bùu Nwì sə a vesùwèŋ. Bəsə vesùwèŋ kùksəgə Nwì bə ñaaŋ yòŋsə ye, nə sə kwa bə ncu avès nè ndzə ní'ì Jisòs Krest, vesùwèŋ ka tu bə bum sè ma mɛ ŋgùpni' naaŋ.

<sup>4</sup> A ye-a də bum sè mɛ ŋgùpni'ì yà'sə yumok co Nwì jəŋ ŋwè bə zəŋ, də mù duk də mù a dzəŋ mvwe' sè mù gha' bùu sè wo sə jə yà' co yumok yà'sə pwe' mù.

<sup>5</sup> Wo à kom fa mɛ tu mbəmbaam yàm ŋga mɛ nùumbu fwame'. Mvəsə wo à dzə mɛ, mɛ ŋwəò Izùrɛ bə bòp lak Benjamè. Mɛ yè'sə mɛ ŋwəò Hibrù làaŋ vɛ'. A ye-a bə mandzə nè ŋgònòŋsə lùuk bùu Jus wèŋ fana, mù à ye ves bòp bù nè wo togè wo duk də bùu Faràsi nà'a.

<sup>6</sup> A sə ye ma nè ŋgòfa bùu cos wèŋ ŋgə', fana mù təəŋ mantombì bə zəŋ mù. Lùuk avès bùu Jus pwe'fo', mù ka nè mò'fis gbɛ yuk, ŋga ye-a də aco yà' gɛ ŋwè ye kəkurè na.

<sup>7</sup> Bum yè'sə pwe', anə ye co mù sə tsərə də yà'a swe' bohòmù, mù a mè'rə màk yà' pwe' nè pwe' co yusə wà bùu tu Krest.

<sup>8</sup> Bə nè zìnə am pwe', mù jə yà' pwe' mok co yusə wà ya ŋga mɛ riŋ Jisòs Krest nè yi Tà nè njàm nə bùusə ŋgòrìŋ yi a yusə yà' càsə bum pwe'. Mù a mè'rə bum mok pwe' də yà'a bisə ntəŋ bùu yi. Bum pwe' mok bohòmù co bəp də ya mɛ tse' Jisòs Krest,

<sup>9</sup> ya mɛ ye vesi mvwe' mò'fis co ŋwè ye. Mù ka kəkurè mɛ lisə Nwì bə ñaaŋ sè yàm mok ye

fe'le, a bùusè mù a fa ntum àm bohòJisòs. Ka bùusè də mù a nòņsə lùuk bùu Jus sè' yeņ. Mù kèkurè bùusè Nwì a gu mù ngòye kèkurè anə yi. Ngòye kèkurèə vè mègù bə ntum nè ηwè fa nà' bohòKrest.

<sup>10</sup> Yusè mù sə dzəm, a ηgòrì yi, nə tse' ja'a nsàp ηaη ye nè yi à lòkok bə zeη mvwe' kpə nà'a. Mù dzəm sè' duk də mù ye nsàp ηgə' nè yi à yə nə kpə, ya mù ye sè' co yi.

<sup>11</sup> Yà'a mvè'nè mù tse' tsətsərè də mù nə ye sè' mòk ηgòlòkok mvwe' kpə sə.

### *Jihi Nzòη, Nə Kə Ləsə Fo'*

<sup>12</sup> Mù sə kà duk də bum sè mù sə dzəm də mù tse' yè'sə, mù tse' wes yà' laη duk. Ka sè' duk də mù yè'e, mù ka jòn nè mò'fis tse' sè' yeņ. Yusè də mù sə jihi nzòη ηgònìk lòmantombì, ya mù kə tse' lèlək nè Jisòs Krest a jə mù co ηwè ye bùu zeη nə.

<sup>13</sup> Bwema am wèη, mù tsəm də mù ka mvwe' sè də mù tse' yà' laη sə ntøkə dzeη. Yusè mò'fis də mù sə lù bə ηàaη am pwe'fo' ηgòkè dzeη mvwe' bum sè ya' cu mantombì, nə swì mak bum sè yà'a maηkwèη fo'.

<sup>14</sup> Fana mù sə lògù mantombì də ya mù kə dzeη mvwe' ndùu sə, ya mù tse' lèlək nè Nwì à to mù ηgòkə tse' nà' bùusè mù ηwəə Jisòs Krest nə. Nà'a də mù kə cum mubu.

<sup>15</sup> A bəboη bohòvesùwèη sè a gu bə ma nè Jisòs laη pwe'fo' ηgòtse' sè' nsàp tsətsərè nè'nə. Nwè nəmòok ye-a yo nè yi sə tsəm yumok ca zok fana, Nwì gu yi rēēη bə zeη.

<sup>16</sup> Yusè gũgũŋ sè duk dè vesùwèeŋ sè be' lo mali yusè vesùwèŋ nà sè yùu sè.

<sup>17</sup> Bwema am wèŋ, wèeŋ sè be' kù am, nè sè kũk lis bohòbũ sè wo sè yù yà', bũsè vèes ŋgàa nì fa weŋ mandzè nè nà'a bèboŋ.

<sup>18</sup> Mũ à tsè' weŋ bum yè'e mantombi kè' ŋkũũŋntèŋ laŋ. Nè ŋga'a nè'e, mũ sè cèp fe'lè yà' sèmok mok bə ndzəplis, duk dè bwĩŋ mũŋgorè wèŋ ŋkũũŋ sè mandzè awo sè nìtsè' dè wo sè bèŋ fàak sè Jisòs à kpu mũ ntəəŋ ŋgògũ sè.

<sup>19</sup> Wo kè lè nùu dè bũu yè'sə nè tse' ŋgə', bum sè wo sè dzəm yà' bə ŋgùpni', yà'a bohòwo nwii awo. Wo sè nè ni' bə bum sè anə ye co wo koksə marè'tu bə zeŋ. Tsətsərəə awo cu mègù bə bum sè sè nzeŋgòoŋ fən.

<sup>20</sup> Fana vesùwèeŋ yàvès ŋgàa lak sè mũbu. Vesùwèŋ sè kũk mègù bohòŋgà lũŋsè ves, Tà Jisòs Krèst ŋgòtsə mũbu.

<sup>21</sup> Ghà nè yi vèə, fana yi nè kupsə ŋgùpni' avès nè bup nè nà' ka ñàŋ tse' nè'e, nè gũ nà' ye co ni' nje nè nà' tse' ñàŋ. Yi nè gũ ve'nə bə ñàaŋ sè yi tse' ŋgògũ bum pwe' yà' ye sè vəmnoz'è yi sè.

## 4

### *Ntip Nè Pol A Fa*

<sup>1</sup> Bwema am wèŋ, mũ dzəm weŋ, nè sè boŋ mũ co mũ ye weŋ wù kà fũk. Wèeŋ gũgè ntũm àm sè kwa, wèeŋ ŋguk àm nè mũ a sòp tes mũ tuhù mũ. Wèeŋ bũu Tà Jisòs, wèeŋ təəŋ mali gũgũŋ.

2 Mù sè cèp bohòYùdiyà də kwəkwe', bə Sintekèe mesə yusè mʉtsətsə'rəə wo, nə cum mvwe' mò'fis co njè'egù ndzə ni'ì Tà.

3 Mù ləŋ wu Sizigù, nə vesù tse' fàak sè mò'fis də, wu tesə bàa yè'sə wèŋ. Wo bə Kilimè, nə ye bùu mok sè vesiwèeŋ fàkgè mvwe' mò'fis yà'a pwe' a fàk gʉgʉŋ ŋgògù də Ntirè nə Bèboŋ nə nà'a lo mantombi. Liŋ awo cu ndzənə ŋwàk lùŋ.

4 Mvè'nè wèŋ cu ncu àwèŋ nùumbu pwe', wèeŋ sə kwa bə bum sè ma nə Tà Jisòs. Mù sè cèp li sèmok duk də wèeŋ kwa!

5 Wèeŋ ye fùə wèŋ bwìŋ wèŋ. Tà ka səsap mok cum.

6 Kà də wèeŋ sə fa ntuum awèŋ ŋgə' bùu yumok duk. Yusè wèŋ sə jamə lòoŋ, wèŋ sə ləŋ bohòNwì. Ghà nə wèeŋ ləŋ yi lòoŋ, wèŋ ləŋ bə ntum nə kwəkwa.

7 Fana fifi Nwì nə nà' yam càsə mvəsə co ŋwè tsərə pwe' nə ye sə ntuum wèŋ bə tsətsərə awèŋ co yumok kà yà' gù. A vɛ'nə ŋga wèŋ sə nəmsə ntum awèŋ bohòJisòs.

8 Nè ŋgòlèsə bə zeŋ, bwema am wèŋ, wèeŋ sə tsərə megu bum sè yà'a zìnə sè co bwìŋ kwasə yà'. Yà'a ye bum sè ya' tse' bəboŋ nja, yusè yà'a rərəŋ, sè ya' tse' dzədzəm nə ye sè bwìiŋ yə-a yà', wo jəŋ yà' co yumok.

9 Wèeŋ sə gʉhʉ bum sè mù à yə'rə wèŋ, wèŋ nə dzəm yà', a bum sè wèŋ à yuk mvəsə mù à sè cèp, nə sə gʉ. Yi Nwì nə yi fagè ves fifi, yi nə ye wenə wèŋ.

*Pol Kwasə Bùu Filipiyà  
Bə Tətesə*

10 Mù sè kwa, nè sè kwasè Tà Nwì wùrìṅ bùusè a sap wùrìṅ, wèṅ nè yètoònə ṅgòtesə fe'lə mụ sèmok. Mù sè kà duk də wèṅ à swì mụ swì duk, yusə də wèṅ à ka mvək mantombi anə tse'.

11 Ka də mù sè cèp bùusè mù sè tsərə duk də mù a sè dzəm yumok yeṅ. Busè mù rì mvəsè ṅgòcu yu am bə kwəkwa ṅga mù ka-a yumok tse' nà'.

12 Mù rì ncu jìṅ bə ncu ghàk ba fo' mù. Mù a rì nsàp nè'nə, nè ləəṅ bə zeṅ, ya ṅga mvwe' sè mụ cu, ghà yà pwe', ṅga mụ zəze' bə nè mù cu nje, nè mù tse' ṅkùṅṅ kè də mù tse' gù moòm ntilip pwe'fo', mù rì mvəsè mù cum yu am kəkərè.

13 A ye-a sè' bə nsàp nè fòlòṅ, aco mù cum riṅ bə zeṅ. Jisòs Krèst fagè mụ nsàp ṅàṅ nà'nə yì.

14 A ye-a sè vè'nə, bòwùrìṅ mvəsè wèṅ à tesə mụ ghà nè mù a cu bə ṅgə' nà'nə.

15 Wèṅ bùu Filipiyà, wèṅ rì yàwèṅ sè' duk də ghà nè mù à yè'e mè'rə lak Màsìdoniyà ṅga mù à sè tsòho to Ntirè nè Bəboṅ nè, à tesə gù mụ wèṅ. A sè fa kurə gù mbo vesùwèṅ, cos mòk nè zok a ka mụ tesə.

16 Fana mù à cu mvwe' lak Tètàlonikà, ghà nè ṅga mù ka yumok tse', wèṅ tum fa mụ sè'. Yè'sə à ka kè' mò'fis mègù.

17 Ka də mù tes gha' ntəm àm bə bum sè wèṅ na tum fa mụ yeṅ. Mù sè kwa gha' yàm bə swe' nè wèṅ nè tse' bohòNwì bùu bum sè wèṅ sè tum fa mụ ye'sə.

18 Yusè mù a sè jamə yà' pwe', wèṅ a fa mụ, nè fa casə cù. Mù a yə bum sè wèṅ a tum fa mụ

bohòÏpàfoditòlan. Yà' a gù mɛ, mù sɛ kà yumok mok jamè fe'lè. Bum yè'sɛ co mve' làmindàa sè wo kɛ' fagè Nwì co satikà' yà' sɛ rəm saan bònɔsɛ Nwì wùrin yà'a.

<sup>19</sup> Nwì àm nè yi ngà ghàk maŋgəŋgèen nɛ fa wèn yusè wèn sɛ jamə pwe'fo' ndzə bohòJisòs Krest.

<sup>20</sup> Kèkùksèə ye bohòNwì nè yi Tè' àvès, nɛ kà mè yuk. Yà' ye vɛ'nə.

### *Cècèpsè Nè Nà' Ləsə*

<sup>21</sup> Cepsə fa mɛ bùu Nwì sè wo sè' bùu Jisòs Krest yà'a pwe'fo'. Bwema sè vesiwèn cu fɛɛŋ cepsə wɛŋ sè' bəboŋ.

<sup>22</sup> Bùu Nwì sè wo fɛɛŋ cepsə wɛŋ sè', nɛ kà co sè wo mɛ nto' Sizà yà'a ye wesə.

<sup>23</sup> Bèbo nè Tà Jisòs Krest nɛ ye wenə wèn.

**Nwàk Nwì Ma Rùk Nè Fi**  
**New Testament in Yamba**

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source  
files dated 29 Jan 2022

c475d5b3-da44-51cf-93ca-f255b72fe481